

شنطة البطة حدوتة بالعامية المصرية

حبايبي الحلوين

كان يا مكان كان فيه بطة، البطة دي كان عندها شنطة عجيبة.

الشنطة دي تقدر تشيل أي حاجة وكل حاجة، ومين اللي بيشيل الشنطة؟ البطة.

البطة دي كانت تمشي في الشارع وتقول: أنا بطة وعندي ريش مين يديني لقمة

عيش، أنا بطة وعندي ريش مين يديني لقمة عيش، في يوم وهي بتتمشي شافت

كيس، كيس مليون فلوس، نادت وقالت بصوت عالي: الفلوس الحلوة دي بتاعت

مين؟ بتاعت مين الفلوس الحلوة دي؟

البطة بطة أمينة، البطة ما تاخذتش حاجة مش بتاعتها، سمع البطة راجل مش أمين

فطمع في الفلوس وقال للبطة: الفلوس دي بتاعتي يا بطة.

صدقت البطة الأمينة كلام الراجل اللي مش أمين واديته كيس الفلوس.

الراجل اللي مش أمين اخذ الفلوس فرحان ومبسوط، ورجع بيته وقال: خدعت البطة

وضحكت علي البطة وأخذت الفلوس.

فضلت البطة تمشي ومبسوطة وتقول: أنا بطة وعندي ريش مين يديني لقمة عيش،

الحمد لله رجعت الفلوس الضايعة لصاحبها.

سمعها الهوا وقالها: يا بطة يا بطة الراجل اللي مش أمين ضحك عليكي، الفلوس

دي مش بتاعته، ولازم تاخديها منه وترجعها لصاحبها، سمعت البطة كلام الهوا

وزعلت أوي.

البطة زي ما قولنا بطة أمينة، وكمان البطة بطة شجاعة فقررت البطة تروح لبيت

الراجل اللي مش أمين، وتاخذ منه الفلوس، راحت البطة بيته وقالتله: ياراجل يا اللي

مش أمين هات الفلوس هات الفلوس علشان أرجعها لصاحبها، صرخ في وشها

الراجل اللي مش أمين

وجري وراها وكان هيمسكها، وأخذ ريشة من ديلها، لكنها لحقت نفسها وهربت من إيده وجريت.

فضلت البطة تقوله: من بعيد هات الفلوس دي مش فلوسك، هاتها عشان أردھا لصاحبھا، الراجل اللي مش أمين قفل بابه في وشھا.

وهي فضلت تمشي وهي زعلانة و تقول: الراجل اللي مش أمين أخذ الفلوس لازم أرجعھا لصاحبھا، سمعھا الفار وسألھا: ليه زعلانة يا بطة أساعدك إزاي يا بطة؟ فحكتله حكايتها مع الراجل اللي مش أمين فقالھا: خديني معاكي في الشنطة أساعدك ترجعي الفلوس من الراجل اللي مش أمين، ودخل الفار جوه الشنطة. وشالت البطة الشنطة العجيبة وكملت مشي ف قابلت السلم الخشب عرف منها الحكاية، قالھا: خديني معاكي في الشنطة اساعدك يا بطة، دخل السلم الشنطة وشالت البطة الشنطة وكملت مشي، وهي ماشيه قابلت إربة ميه وحكتلھا الحكاية فقالتلھا: الإربة خديني معاكي يا بطة، اساعدك يابطة ترجعي الفلوس من الراجل اللي مش أمين ودخلت إربة الميه الشنطة، وشالت البطة الشنطة وفضلوا ماشين لحد لما وصلوا بيت الراجل اللي مش أمين وهي شايلة في شنطتها العجيبة الفار والسلم وایه کمان؟؟ وإربة الميه وقفت قدام البيت وقالت بصوت عالي وبشجاعة: افتح افتح الباب هات الفلوس اللي مش بتاعتك علشان أرجعھا لصاحبھا، مسکھا الراجل اللي مش أمين وحطھا في عشة الفراخ وقالھا: مسکتك يا بطة حبستك وبكره هادبک واکلک مع الملوخية اللذيذة، وريني بقي هاتخدي الفلوس ازاي، سابھا الراجل جوه القفص وهي مش عارفة تعمل ايه، خرج الفار من الشنطة وقاراض الخشب الحثة بتاعت العشة، وخرجت البطة ورجعت تخبط علي باب بيت الراجل وتقوله: افتح الباب هات الفلوس علشان أرجعھا لصاحبھا،

الراجل اللي مش امين اتعجب وقال لنفسه :ازاي خرجت البطة من العشة ،انا همسكها واحبسها جوه الببير ، مسكها الراجل اللي مش امين وهاحفها جوه البير الغويييط اوي اوي ،وقالها :مسكتك يا بطة حبستك وريني بقى هتاخدي فلوسك ازاي،وقعدت البطة جوه البير مش عارفة تتصرف ازاي ،خرج السلم الخشب من الشنطة العجيبه وطلعت البطة على السلم وخرجت من البير،ورجعت ثاني بيت الراجل اللي مش امين تخبط تخبط وتقول :افتح افتح يا عمو يا اللي مش آمين هات الفلوس هات الفلوس عشان ارجعها لصاحبها ،اتعجب الراجل اللي مش آمين وقال لنفسه :ما هذا ايه دي بطة مسحورة دي ،احبسها في العشة تطلع ،ارميها في البير تخرج ،خلاص انا احدفها في الفرن عشان اتخلص منها للابد ،مسمعش صوتها مره ثانيه ابدأ ،فعلاً حظ الراجل اللي مش امين البطة جوه الفرن كله نار، واول لما دخلت البطة بسرعة طلعت إربة الميه ،وطفيت النار اللي في الفرن، فرجعت البطة تخبط على باب بيت الراجل اللي مش امين وتقوله :هات الفلوس هات الفلوس اللي اخدتها دي مش فلوسك هاتها علشان ادور على صاحبها ،خاف الراجل منها وقال :بطة مسحورة بطة مسحورة ودخل بيته بسرعة وهو بيمصرخ وأداها الفلوس ،وقفل بابه عليه بالمفتاح ،دلوقتي كيس الفلوس بقى مع البطة ،البطة ضحكت علي الراجل اللي مش امين واخذت منه الفلوس وخرج الفار والسلم وهربت الميه من الشنطة وكلهم فرحانين ومبسوطين،والبطة شكرتهم عشان ساعدوها ،وبدأت البطة تمشي ثاني وتقول :الفلوس الحلوة دي بتاعت مين ،بتاعت مين الفلوس الحلوة دي، انا بطة وعندي ريش مين يديني لقمة عيش .

وتوتا توتا خلصت الحدوته يارب تكون حلوة مش ملتوته .

اللي كتب الحدوته نادر أبو الفتوح.

الحكي منقول من حكي لأبلة فضيلة.

تمصحو علي خير